

當陽縣志卷十三

人物志 下

篤行

昔王彥方以貞白居易鄉里中不肖畏其知名司馬溫公誠信自然陝洛間化之知篤行之感人深也邑之文采風流較他邑未能競爽而敢禮教崇信義猶有古人之遺風焉矩矱法乎高曾聞望著於里黨視世之弋名釣譽矜尙浮華者相去遠矣採而錄之可以覘一邑之士習民風

當陽縣志

卷十三

人物

篤行

一

云作篤行傳

國朝

謝曰藻字素生邑明經居合溶性謹厚明於大節明季流寇之亂藻載其宗譜掘地以藏之者三得不燬國朝定鼎後有薦藻於雲南逆藩者僞徵至藻力卻之子四其三子與兄子戲墮水死藻惟隱慟待兄子如初及長析產之半與之無稍靳壽至九十七三子俱邑庠孫永聰康熙甲午舉人

舊志列傳

劉鴻儒字介臣邑明經性倜儻明於治術邑令訪以

時務必直陳利弊於地方大有裨益時論韙之授湘鄉訓導未就卒年五十九

張遷喬幼嗜學畝尙實行嘗侍繼母疾月餘衣不解帶性好施與鄉里貧乏者賴之每建議多切時務當道常採用焉子孫遵遺訓能以詩書世其家

劉曰漢郡庠生幼力學小試輒冠軍父大名訓子有方漢率教惟謹一時稱其孝友性復耿介居城中不履公庭邑令益重之子六四列膠庠成明經者二張泰郡庠生好學能文志行純篤日手一卷泊如也

當陽縣志

卷十三

人物

篤行

二

母病數年泰侍湯藥未離寢門及執喪哀毀骨立遂成羸疾未幾卒閭黨憫之

魏尙志邑庠生性沈潛篤於天倫以優行舉社學長其訓徒務崇實學遊其門者多謹飭士與兄同居家事必稟命館穀所入悉以歸兄自號許山樵子楊枝蕃貢生前任邱令州彥之元孫也家學淵源居心仁厚生平不喜聞人過每爲人排難解紛同里莫不悅服

馮袞邑明經立品端方平易近人與長兄相友愛終

其身未嘗析居和樂萃於一門鄉里稱之

宋士獻字徵可邑諸生性樸直喜藏書籍延塾師於家課親故子弟之貧者助膏火焉值歲歉爲饘粥以食餓者寒爲之衣疾爲之藥小惠幾徧鄉里也沮水西有楊五寺隄實踞六隄上游丙子大水隄決數里下流盡爲洪濤獻倡議修復所費不貲及竣享其利者萬家以子貴封奉直大夫子楚望官至知府楚材武舉

郭衿賢邑明經明孝廉郭之都之季子伯兄毓賢以

當陽縣志

卷十三

人物

篤行

三

死脫父難見孝友傳仲兄祺賢以選拔任雲夢諭有傳郭氏以詩禮世其家衿守訓尤謹子孫勝衣冠者雖燕見必冠家故饒子孫無衣紈綺者族有佳子弟必成就之姪孫俊成進士衿賢力居多子八孫璟恩貢生璨以文行重儒林有傳琦瑛皆廩生瓊貢生諸孫多列庠食餼當陽孝友文學之家必首郭氏云任宏仁性孝友兄宏韜遠出不歸仁貸資斧尋於江南及至兄已歿號痛幾絕輿櫬以歸後與姪析產推腴讓美無吝色鄉里義之子之朝明經之超之烈俱

庠生

趙開祚邑廩生少穎悟工文小試輒列前茅屢膺闈薦性孝友立品端凝同里莫不敬服子州傳明經侯登元邑人父啟珏嗜酒好交遊家資幾盡登元善爲治所獲利多具酒食以娛父其善體親心如此任楚雄邑庠生弱冠能文八赴秋闈不售性尤樂施乾隆乙亥水泛朝陽山麓范家垵堤潰數百丈陷爲巨潭楚雄星夜募夫每日設餐一次共計一萬三千餘工隄成建關廟於其上置田五十畝以供香火

當陽縣志

卷十三

人物

篤行

四

復糾垵民築沿河隄三百餘丈范家垵始成樂土家貲半耗不計也

曹之冕字服周性淳厚其事親委曲承志終身無間遇歲不登冕周濟鄉鄰設饘粥以食餓者分遣僮僕種蔬菜於涸澤中迨春二麥未熟飽菜羹以活者甚衆卒年七十

曹士焯邑監生負氣節重然諾能急人之難族弟士烈家赤貧或誣以盜幾不免賴士焯力事得白生平義舉多類此

祁朝陽例職州同幼嗜學性謹厚其父早世事母以孝聞偶逢母怒即以小杖奉願身受也性尤好施遇歲歉出穀麥以濟鄉里至數百石無吝色一方賴之張志毅字方引邑庠生孝友純篤博涉羣書從無疾言遽色對者矜平躁釋享年八十四子玻孫崇職俱邑庠

黎适臣邑耆民性寬和持重尤喜施與生平領修橋梁甚多獨造結緣橋二有碑誌其事年八十餘卒蔣士英邑合溶人性端方不出戶庭喜建橋有募必

當陽縣志

卷十三

人物

篤行

五

傾囊應之乾隆二十三年捐銀購石重修合溶上下街道及武公橋行人便之

楊永杞性醇古乾隆四十七八年大疫先後施棺百餘具親族不能嫁娶者必助之貲小惠幾徧鄉里也卒年七十八

劉學朱邑貢生性孝友訓子孫力敦本行尤樂義舉贊建學宮書院勞怨不恤晚年主講迴峰書院獎勵後學甚多卒年七十五子經時邑庠生

劉九星字德軒邑耆民明山西按察副使煥八世孫

也博學篤行翰墨自娛所居魚兒總壤地交錯國  
初清丈田畝邑令造廬商摧一總田賊井井有條皆  
其力也

黃映蓋邑庠生孝友樂善父早卒母教之嚴蓋率長  
跪待罪必霽顏乃起弟不善治生常私鬻其田蓋爲  
贖還監修學宮書院經費出入絲毫無所紊關南  
建石橋蓋捐貲獨多或請立石傳其事蓋辭謝焉卒  
年七十二

何獻文邑耆民退讓急公時稱長者所居距城百里

當陽縣志

卷十三

人物

篤行

六

而遙邑令苗重其人諉以督修學宮書院文竭力  
經營一年未嘗歸里同里有毀之者文輒自引咎子  
正楚邑庠

任哲雄邑人樂善好施嘗於柳林港倡建石橋行者  
便之從弟惠雄夭所遺孤僅三月哲撫育以至成立  
鄉里義之

楊先佑邑介賓慷慨好義乾隆甲寅方脩邑乘佑襄  
其事不憚勤勞未幾卒前令黃爲作墓誌詳藝文中

以上續  
舊志

林一枝字桂亭 恩貢生家居授徒品學交勵及門  
列庠序者四十餘人晚年課益密所得脩脯分資諸  
姪於族戚中孤寡者益加厚焉卒年七十三嗣子茂  
先邑庠生

曹世煥字永亨廩生力學負品望乾隆甲寅脩邑志  
採輯北鄉事編次多出其手無溢美辭嘉慶初教匪  
起煥籌資募鄉勇堵要害縣北諸境悉賴以安總督  
畢公嘉其功給六品銜性復恬退每膺懋賞輒以疾  
辭卒年四十有八

當陽縣志

卷十三

人物

篤行

七

羅有臨漳河人性孝友周恤貧乏無德色升斗之惠  
幾徧鄰里晚年好讀史晝夜不輟孫曾林立四世同  
居卒年八十六孫驥鳴同治元年登孝廉方正科餘  
多食廩餼能世其家法一鄉慕之

林時傑字豪士漳河人篤信和惠里黨之暴戾者悉  
感化之年八十有三子孫相繼列膠庠

林大仲漳河人性廉潔取與不苟偶過市拾百錢於  
道知爲貧者所遺仲鵠立道旁待遺者至與之其謹  
厚類如此卒年八十有三

徐開祥邑廩生嘉慶初以軍功授六品銜性恬靜篤於天倫兄有疾親理湯藥左右扶持數年無倦色立家塾課子姪皆有聲庠序孫中慧道光乙未副貢中青庠生

鄭冕字禘周邑耆民年二十四妻黃氏物故冕誓志不再娶撫二子一女至成立持身高潔與物無爭鄉里稱長者守義至四十七年卒年七十子孫蕃盛能以耕讀世其家

牟登典字蓮溪性醇謹事親以孝聞嘉慶初教匪之當陽縣志

卷十三 人物 篤行 八

難典隨父趨避中途相失號呼入賊穴賊酋義而釋之比歸則其父已在門性好義與葉開道捐置義田以充里中公費嘗應試歸拾金於道知爲貧者所遺守而待之及晡遺金者至詢知爲人傭也悉以歸之未嘗告以姓字生平喜吟詠耕釣之外惟以詩酒自娛所交皆知名士唱和無虛日著有山水堂詩稿卒年七十有七次子經瑞庠生

葉開道字梅塘邑監生勤學好施嘗置家塾顏曰百穫堂以課子弟道光初與牟登典捐置義田三石作

黃石總東甲公費一鄉稱之孫化中庠生  
李祖修邑耆民居河溶鎮性端方好義舉嘗置田一  
頃施作義地監修河岸石磯勤勞七載經費不足則  
稱貸以濟之生平建橋梁修街道慷慨資助善行甚  
多卒年七十八子天保邑庠生

郭元鳴字仁山邑明經父應運性純樸元能繼之篤  
於孝友待人無畛域卒年六十子壽壬廩生

楊永清字知白邑耆民父達天兄永芳永華俱於嘉  
慶初殉難時清尙幼上事母嫂下撫弟姪辛苦備嘗

當陽縣志

卷十三

人物

篤行

九

家故貧讀書不輟既老猶吟詠自娛子孫繼起五世  
同堂卒年八十

鄭若蘭貢生性謹厚不輕然諾鄉里爭訟者得其一  
言而解遇貧乏必任卹之咸豐六年大旱人畜皆渴  
蘭有水半塘計灌田可穫數百斛蘭坐視其苗槁以  
水濟飲一方人畜賴以全活鄉里以爲難

曹邦詔字晴嵐邑監生少失怙事母以孝聞嘉慶初  
教匪之變詔爲義勇長防堵有功將軍舒公奏給八  
品以母老不求仕持身端正與物無爭子汝漢汝暄

俱邑庠孫曾繼起五世同堂邑令方爲題額以表其門卒年八十七

鄭光耀議敘國子監典籍性孝友昆弟五人晰居後任卹無德色遇義舉必解囊飲助其好善樂施爲鄉里所稱道卒年七十子以芬邑庠

羅驥鳴字雲騫幼嗜學年十五補諸生登同治元年孝廉方正科其事親曲盡其孝昆季相友愛常藹然如孺子時立家塾課子姪皆循循有法相繼列庠序咸豐初粵氛方惡遠近避寇者多主其家鳴力爲保

當陽縣志

卷十三

人物

篤行

十

護歷久無德色生平重然諾識大體凡邑中盛舉如賓興膏火及加廣學額皆竭力籌畫務求有益於士林邑令常倚任之歲在乙丑重修邑乘鳴襄理局務甫及開雕以勞疾輿歸賚志而沒聞者惜之卒年六十五

文苑

茲邦文章之士著錄自

國朝始蓋前代俊流淪湮者多矣夫蜀得司馬相  
如始擅詞賦之聲聞得歐陽詹始以古文明二  
邦之士自此含英咀華如雲而起矣無他鬱之  
久者宣必暢也若茲邦者仰其山紫蓋玉泉孕  
靈而誕秀睇其川清漳曲沮噴珠而濺玉吾見  
自茲以往家雕龍而人吐鳳也况紛綸宿彥名  
播簡篇者已導其先路哉未沫前芬方揚後馥

當陽縣志

卷十三

人物

文苑

十一

作文苑傳

栗引之字長伯前明孝廉聯芳嗣子也博學多聞由  
選貢考授縣丞性曠達不樂仕進移居青溪山中茅  
屋數椽泊如也每攜老僕背書囊入玉泉鬼谷諸幽  
處兀坐把玩發諸吟詠其陶寫天真不染塵氛如此  
生平惟與楊州彥稱莫逆交唱和無虛日初邑乘廢  
缺引之毅然重修兵燹後搜訪維艱得殘篇於劉鴻  
儒家摩挲考究彙次成書一切治亂沿革瞭如指掌  
而於賦役風俗土宜諸條尤三致意焉他如玉泉山

志亦出手裁著有  
大雲樓稿子宗高亦以能詩稱  
熊荷生字擔人邑貢生幼勤學爲文一軌先正家貧  
授徒於鄉出其門下者多知名士

謝申裔邑庠生篤學工文里黨知名

劉續祖字二史少失怙受學於許白雲未冠補邑庠  
嘗遊長林諸生方矜談石鼓文續祖證辨娓娓聞者  
靡不傾折爲制藝規有明諸家神骨畢肖家貧授徒  
能誘掖後進一語之合必獎勵焉初有志進取兩入  
都門艱於遇歸輒放情詩酒嘯歌涓溪方山間所著

當陽縣志

卷十三

人物

文苑

十二

詩古文辭獨闢畦徑人爭傳誦卒年七十

牟萬鵬邑明經篤志於學師事長林胡念先研窮經  
義至於子史詩文經手考訂抉摘皆中肯綮藏有磨  
心鏡教學譜

王炎字烈山雍正癸卯選貢少沈重寡言笑安貧嗜  
學尤潛心性理諸書發爲文字根柢深厚無蕪雜影  
響之詞間形於詩歌亦質樸有理趣結廬江上生徒  
從遊者衆卒年五十餘

李和煦邑貢生少勤學敦孝友性復曠達不事生產

作業授徒於鄉歷數十年所成就甚衆

黃大經邑廩生嗜學能文家故貧事繼母克盡其孝授徒數十年出其門者多知名士人謂文行兼長云嚴方英邑廩生少聰穎援筆能文爲士林所推重從之遊者皆有聲庠序未遇早卒

吳迪邑廩生立品端嚴不苟言笑一時從遊者多謹飭士前邑令王深器之

劉容字伯度邑廩生少勤學受業於季父續祖以孝友世其家讀書能強記周泰以下諸子史雖隱僻叢

當陽縣志

卷十三

人物

文苑

十三

雜事信手拈擦不譌一字其屬文苦心孤詣不落恆蹊以數奇艱於遇年四十七卒

郭孫璨字湘琳邑廩生天資沈敏爲文刻摯小試必列前茅其事親躬扶臥起調飲食每得佳味輒喜勸加餐友恭諸昆亦本至誠自顏其齋曰弟兄師友家藏外聞人有異書必借觀儀禮通考冊府諸大部皆經手抄疾前二日猶搦管不輟年四十二賚志以歿張開佐邑明經性沈靜七歲入塾即正席端坐目不旁矚及長溺苦於學於大易啟蒙性理精義諸書尤

潛心焉家居授徒以正誼明道爲本其爲文亦恬雅  
深醇著有真積堂文集

曹思濬字巨川邑廩生性豪邁博覽羣書詩古文詞  
乘興寫懷如風雨驟至晚年造詣一歸於正乾隆壬  
辰報明經旋卒

曹佩維字懋四邑廩生諸兄早逝撫孤姪如己出子  
弟有過不深責但令旁坐靜思各謝罪乃已其宗祠  
自明季燬於兵佩維捐貲倡建復捐田供祭祀有餘  
則以濟宗族之貧而賢者族中咸遵訓迪不肖者慚

當陽縣志

卷十三

人物

文苑

十四

其知名恩誼之隆稱於里黨也爲文精闢峭勁懇切  
不可磨滅著有深柳堂文集

張鴻敘邑明經爲人沈靜簡默少孤貧遇書皆手抄  
窮年攻苦卒徵博洽爲文骨氣嶙峋不拘常徑以明  
經終邑人惜之

盧嗣遜字方舟邑庠生少孤銳志於學有文名家居  
授徒所成就數十人族隸軍籍遜爲置義田以濟漕  
運又涓溪之義塚地方山之起鳳橋皆其倡置也晚  
年精於醫所濟甚衆舉鄉飲正賓著有方舟文集醫

方解補藏於家年七十無疾而卒當暑三日及殮面如生子效棟庠生

以上續舊志

葉文在字愛梅乾隆戊辰科副榜幼嗜學明於訓詁既而博覽羣書得其精義爲文一規先正爲士林所傳誦從之遊者以品學相高後多爲名宿焉

胡作材字械村邑明經家貧嗜學小試輒冠軍前邑令衛肅才之稱爲士林翹楚性端嚴燕居必正衣冠其屬文一軌先正不屑從時尚家居課徒以品學相規從之遊者多知名士既老蒔花種竹吟誦不輟爨

當陽縣志

卷十三

人物

文苑

十五

煙屢虛泊如也卒年八十四

羅開泌字達泉邑明經性醇謹不以冥冥隳行遇事和平無疾言遽色其授徒精於訓詁最能啟發後進從遊者衆先後列庠序者七十餘人輯有西園講義待梓卒年八十一

張致青字涵清邑明經少有才思溺苦於學經史外惟嗜古文詩詞作賦必宗漢魏學使初公奇之稱僅見焉性高潔爲塾師必擇所爲主脩脯非所計課讀之暇輒攜酒垂釣盡日忘歸其書畫皆有異趣晚年

家益落衣食常不給惟日以翰墨自娛卒年七十  
羅鵬程字雲岸邑庠生父承旨以篤學爲名諸生鵬  
程克世其業以禮法自持家居授徒喜獎勵後進一  
時從遊多知名士每自塾中歸先謁其兄侍坐移時  
太和之氣溢於庭除里中稱之

李森桂字蘭蓀邑廩生幼失怙事母以孝聞嘉慶元  
年教匪之變桂奉母避山中險阻備嘗而定省無闕  
性聰穎援筆成文文亦清遒刻摯爲後學所傳誦

熊問世字子才邑明經家世業儒問世尤純粹道光

當陽縣志

卷十三

人物

文苑

十六

中總督訥公閱兵過縣延致館舍訪以邑中故事晤  
對移時所陳皆有根據訥公深器之稱爲一邑名宿  
嚴大箴字勤軒邑明經性醇謹溺志於學所作詩賦  
文詞皆有考據爲後學所傳誦書法亦工卒年七十  
八弟大訓邑庠生亦以能文稱

張金字雲程邑明經居心謹厚和平接物爲生徒講  
學務發明經義不沾沾於制藝晚主書院講席散品  
勵學多所裁成卒年八十四子致峻致潔俱列黌序  
能以詩書世其家

聶子英字安業性沈靜持身高潔博覽羣書挾其精  
蘊嘗謂讀經如侍嚴師讀史如對法官人能以史通  
經以經定史方不愧爲根底之學晚年益工詩自漢  
魏以降至唐宋各家皆詳加考訂論晰微芒閉戶吟  
誦垂四十年著有安業詩草卒年七十

張尙俊字梅岩性曠達喜吟詠所交皆知名士唱和  
甚多卒年四十七

李集堂邑明經性誠樸溺苦於學訓徒數十年門下  
多知名士卒年七十餘子嗣英邑庠

當陽縣志

卷十三

人物

文苑

十七

曹步瀛字星槎邑庠生幼英敏勤於學摹龍門史記  
百三十篇故其文皆有根據課徒於家從遊者多列  
庠序卒年七十八

隱逸

學古入官乘時利見士君子之恆軌也然堯舜  
在上下有巢許嚴陵處光武之世而以漁隱終  
亦各行其志而已邑之山水佳勝靈秀所鍾自  
應代有偉人而見諸仕版者顧寥寥焉知山林  
岩穴之間懷奇抱異甘心沈淪者爲不少也茲  
沿舊志掇其可考者得數人焉於以表章潛德  
且可以愧天下之逐逐浮榮者矣作隱逸傳

元以前不可考

當陽縣志

卷十三

人物

隱逸

十八

衛應辰邑人博學篤行隱居弗仕有古逸民風自號  
臨沮散人入祀鄉賢祠

明

鄭克昌字伯賢原籍福州祖崇進士官本學教諭因  
家焉克昌少爲諸生屢赴秋闈不售遂棄去放浪山  
水間吟詠自適遠安鮑令慕其高數造訪皆不納本  
邑馮令思得一見終不報嘗采禹貢周官及管韓荀  
賈諸篇彙爲一書皆有見地子餘慶字五雲歲薦歷  
歷任教諭篤行有父風

楊誌字石父弟兄皆諸生誌獨嗜讀書工詩不屑習舉子業及壯好遊嘗至吳越踪跡多在湖湘問生平不喜見貴人長沙禹山宗王善詞賦誌乃以布衣取重郡邑有司造廬欲一見不可得子弟疑其倨誌曰予布衣又腹大不能長揖庸倨乎一日於遊次覽鏡見白髭驚曰予老矣堂上且有兩華髮人安可復出自是嘯吟田間十餘年卒年六十六誌爲詩澹宕有幽思無淒韻深得風騷之致遺草數卷大都沅湘間語多幽折田居語多和暢

當陽縣志

卷十三

人物

隱逸

十九

國朝

張曰旦邑鴻橋人敦倫樂道儉德傳家喜讀書年三十餘無意進取閉門卻掃凡五十一年自號雙河居士卒年八十四前數日呼子孫至榻前誦曲江感遇詩二章囑錄朱子儉德帖置座右

以上續舊志

耆壽

三代最重養老漢遂承之頒肉帛酒醪徧及天下耆老此誠驅民壽域躋世福林之盛事也茲邑山川相繆民生敦龐閭閻高年多以壽考著稱非獨得諸地氣其亦優游於

聖仁德澤者深矣連類書之以徵休美作者耆壽傳文太常邑沙溪里人年百三十一歲明 間授壽官孝廉瓚其十世孫也

張際太邑庠生年八十六性節儉燈下能作蠅頭小

當陽縣志

卷十三

人物

耆壽

二十

字乾隆庚戌

恩賜衣帛米肉

楊正元邑人簡重端方乾隆四十三年壽至九十學憲洪錫以敦行壽臧匾額卒年九十五孫起崙庠生

莊方昇邑人好善樂施尊師重道晚年尤力行陰隲卒年九十二

林可裕邑胭脂總人性耿介耽經史隱居自適不求聞達終日危坐手一卷至老不懈

楊鉞字定西鄉賓楊先佑之祖端嚴和厚喜排難解

紛卒年九十以上續舊志

朱在聘邑鴻橋人康熙時庠生好讀書而艱於遇家居授徒一以和鄉鄰息爭訟爲實務卒年九十有二劉鉅邑諸生居魚兒總伯父尙衡父尙典俱年逾八十鉅尤勵學鄉里稱善人夫妻齊眉卒年八十四子三祝議叙六品

誥封奉直大夫現年八十三三世俱登上壽能以詩書世

其家亦門祚之盛者孫德華道光丁酉拔貢

當陽縣志 卷十三 人物 耆壽 二十一

朱玉成五總人性廉靜和睦鄉鄰年百有十歲邑令

蔣遇春爲題養德天和匾額以表之

趙純懋安陸郡庠乾隆性廉介取與不苟孫曾林立

五世同居卒年九十八

游于清字春軒高祖逢盛康熙朝舉人清其元孫也生子五孫十四曾孫十七元孫四目擊先後七代所居猶是明時舊廬卒年九十八

林中文漳河總人性純孝耿介好義嘉慶初教匪犯境文負瞽母走百餘里避之嘗充鄉勇防守有功年

九十餘夫婦齊眉步履如壯者子栖鶴 恩貢生  
柏山岱邑上總人性謹厚取與不苟不出戶庭者四  
十年見貧苦親鄰尤加周恤卒年九十

王鳳字襖蘭秉性耿介取與必嚴五十始娶年九十  
七已抱曾孫邑令董文煜爲書熙朝人瑞匾額以壽  
之

楊嗣緒邑農民年九十有二子孫蕃衍以勤儉世其  
家

王可望邑漳河總人以耕讀爲業卒年九十子孫相

當陽縣志

卷十三

人物

耆壽

二十二

繼列膠庠曾元以下日蕃衍云

謝子周邑三洲總人以勤儉起家年九十有七

陳應書三洲總人守正不阿年九十有六無疾而卒

熊遠朝邑呼兒總人厚重端凝子澤興亦年八十有

五孫曾以下稱蕃盛焉

龔忠貴邑農民性謹厚寡言笑輕財好義鄉里稱之  
卒年九十有六

張大定邑農民性嚴正識大義嘉慶元年設卡堵教  
匪匪黨潛竄秋家砦負固不動大定偕雷啟輝謝盛

紳陳啟鳳共率鄉勇數千破砦滅之道光元年卒年九十有六

雷興邦三洲總人性質樸五世同居卒年九十有六  
汪長謨邑人居呼兒總性廉介閭黨爭訟者咸質成焉現年九十子孫二十餘人五世同居鄉里義之  
汪士杰呼兒總人父早卒事母以孝聞置義田百畝以所入周窮乏不責其償四世同堂卒年八十二  
余之連漳河總人性質樸與物無爭幼逮事祖父母晚年抱元孫親見七代曾元以下日蕃盛年九十有

當陽縣志

卷十三

人物

耆壽

二十三

八髮妻劉氏亦年九十二壽考齊眉一鄉慕之  
杜宏器字玉華與弟宏文相友愛終身未析居子孫蕃衍孝友一堂宏器議叙六品卒年八十八宏文舉仲賓卒年八十四

張自潔邑庠生少孤事繼母維謹數十年無間言性和寬與物無爭子孫相繼列庠序卒年八十七  
賀志初邑庠生耕讀爲業不干外事卒年九十  
曾志吉胭脂總人性溫厚能排難解紛子三孫九現年八十八猶稱束強云孫康明廩生

曾紹典邑人少孤習於勤苦妻馮氏稱賢助典性正直言笑不苟年九十有六猶耳目聰明步履如少壯時子五俱登中壽孫曾日蕃盛云

何明宣邑農人現年八十有九猶能負百斤終日不輟弟廷宣清宣俱年逾八十昆弟俱登上壽鄉里稱人瑞焉

宋良萬邑大蓮總人妻許氏勤儉起家夫妻偕老子四孫曾林立萬年九十六猶康強如壯者許氏亦享年九十三

當陽縣志

卷十三

人物

耆壽

二十四

張道成邑五總人居心謹厚篤於天倫嘉慶元年教匪之難舉家引避成年甫十七以一身保護之卒無恙生平課耕課讀家政肅然鄉里咸稱道焉卒年九十孫鳳寅文煥俱入邑庠

文志國邑四總人嘉慶初充鄉勇剿賊以功授藍翎千總不樂仕進其居家急公好義卒年九十三曹孫蛟邑胭脂總人慷慨樂施無吝色閭黨蒙惠咸稱長者卒年九十

流寓

勝母則曾子不入朝歌而墨翟迴車古之人偶焉託足必慎擇其地里仁所以爲美也然風俗之轉移又往往視乎其人邑自仲宣作賦振起人文迨有宋名儒如唐質肅胡文定朱漢上諸公棲遲林泉以講明道學此邦之人承其餘緒百世下猶不失爲純謹之風蓋其薰陶涵育者深也憑弔遺跡心嚮往之矣作流寓傳

魏

當陽縣志

卷十三

人物

流寓

二十五

王粲字仲宣山陽高平人獻帝西遷家長安善屬文蔡邕見而奇之曰吾家書籍文章當盡與之年十七辟黃門侍郎以西京亂不就鄉人劉表爲荊州牧往依之粲貌寢通悅表不甚重作登樓賦以自傷表卒劉琮降魏辟爲丞相掾遷侍中朝廷制度悉咨之建安二十三年從征吳道卒

唐

孟浩然襄陽人好義節詩名重開寶間王維極推之隱居鹿門山嘗往來荆門漳沮間陪張曲江遊玉泉

有詩

杜觀甫弟甫在蜀有續得觀書迎就當陽居止之作  
五代

梁震蜀人後梁開平元年進士取道歸蜀時荆南節  
度使高季昌僭號開府荆臺慕其名留之欲辟爲判  
官耻不就曰震素不慕榮利明公不以爲愚願白衣  
從事許之震止稱前進士季昌亦禮重之稱爲先輩  
而不名昌卒子從誨時過其廬贈遺特厚後固請退  
築室於上洲嘗乘黃牛披鶴氅間詣村墅自號荆臺

當陽縣志

卷十三

人物

流寓

二十六

隱士

宋

唐介字子方江陵人嘗客當陽讀書漳水上仁宗朝  
登進士爲武陵尉歷平江任邱令入爲御史裏行轉  
殿中侍御史劾宰相文彥博夤緣宮掖諫官吳奎表  
裏觀望帝怒甚將遠竄介徐曰臣忠憤所激鼎鑊不  
避何辭於謫帝亟召彥博入介責之曰彥博宜自省  
即有之不可隱彥博拜謝不已帝怒益甚貶春州別  
駕帝旋悟明日取其疏入改置英州而罷彥博相吳

奎亦出帝慮介或道死有殺直臣名乃命中使護之由是直聲動天下數月起歷郴潭復諸州尋復原官入對帝曰卿遷謫以來未嘗以私書至京師可謂不易所守矣久之請解職出知揚州徙江東轉運使及彥博再相薦介曰向介所言誠中臣病尋進天章閣待制復知諫院多所論劾旋請外職英宗立召爲御史中丞明年以龍圖學士知太原府夏人數擾邊境多築堡介悉撤之諭以利害不敢動神宗立以三司使召尋拜參知政事帝欲用王安石介言難大任安

當陽縣志

卷十三

人物

流寓

二十七

石好學而泥古論議多濶使爲政必多更變帝弗聽自是數與安石爭辨帝主其說介不勝憤疽發於背卒年六十諡質肅子淑問義問孫恕皆有名

胡安國字康侯淵子也生有異質年十七入太學與伊川門人朱長文斬裁之講論學問日邃登紹聖四年進士崇甯間提舉湖北學使事抵官改湖南爲蔡京所擠除名遂退居漳濱迎父就養定省外惟經籍自娛宣和末廷臣交薦上坐便殿虛懷勞問甚渥奏曰明君以務學爲亟聖學以正心爲要上首肯之以

足疾乞歸至襄陽虜已薄京城時長子寅校書中秘  
賓客爲之憂安國愀然曰主上在重圍卿大夫之辱  
也余恨效忠無路敢念子乎聞者感動及高宗即位  
復論政有九失召爲給事中凡三辭紹興中促召未  
至復除給事就職旬日遂以疾求去有旨令纂修春  
秋以進先是王安石廢春秋防禁益甚安國獨留心  
是經研窮三十餘年曰此傳心要典也至是繕寫奏  
御上屢嘉歎有經筵正論武彝集資治通鑑補遺行  
世卒諡文定從祀孔廟子寅甯宏從子憲俱名儒

當陽縣志

卷十三

人物

流寓

二十八

朱震字子發荆門軍人政和進士仕州縣以廉稱胡  
安國一見大器之薦爲司勳員外郎稱疾不至會江  
西制置使趙鼎入爲參知政事上諮當世人才鼎曰  
臣所知朱震學術深博廉正守道士之冠冕使位講  
讀必有裨益上乃召之既至問易春秋之旨震以所  
學對上悅擢祠部員外郎兼川陝荆襄都督府詳議  
官多所建白後謝病乞祠命知禮部貢舉會疾卒震  
經術深醇有漢上易解大旨宗程傳兼邵張之論上  
采漢魏吳晉下逮有唐及宋包括同異而於象數加

詳云震嘗讀書玉陽學者稱漢上先生

侯仲良字師聖河南人嘗寓當陽顏其居曰時習乃二程之甥得其傳胡安國子宏師事之朱子每稱其人清端勁直不愧師門云

何參彝陵人博學孝義不求聞達隱居當陽稱處士

云

舊志列  
隱逸傳

明

袁宏道字石公登萬曆壬辰進士歸益鍵戶讀書除吳縣聽斷敏決案無留牘未解官起順天教授歷國

當陽縣志

卷十三

人物

流寓

二十九

子助教禮部主事歸臥柳浪湖上凡六年以清望推吏部驗封主事改文選尋移考功員外郎立歲終考察羣吏法疏上報可遂爲定制遷稽勲郎中移病休沐不數月卒於家年四十三萬曆中年王李學盛行宏道昌言排擊以爲唐自有古詩不必選體中晚皆有詩不必初盛歐蘇陳黃皆有詩不必唐人唐詩色澤鮮妍如旦晚脫筆硯者今詩纔離筆硯已成陳言豈非性靈剽擬所從來異乎一時聞者神解翕然宗之石公與弟小修嘗讀書玉泉柴紫菴又最愛紫蓋

青溪往來嘯詠甚多

袁中道字小修公安人十歲著黃山雪二賦五十餘  
言長通經史游情詩酒以豪傑自命嘗泛舟西陵走  
馬塞上窮覽燕趙齊魯吳越之地足跡幾半天下而  
詩文亦日進歸學李龍湖有志出世操觚應舉懷利  
刃切泥之歎久困鎖圍流離世故有憂生之歎萬歷  
丙辰始成進士授徽府教授遷國子博士乞南得禮  
部儀制歷官郎中旋乞休以疾卒年五十四有珂雪  
齋集朱彝尊謂其才不逮中郎而過於伯氏蓋定評

當陽縣志

卷十三

人物

流寓

三十

云 以上續舊志

仙釋

考諸史冊仙釋多不載義綦嚴也然羽客緇流間有超越塵俗爲士君子所樂道者如太白之於元丹邱昌黎之於大顛子瞻之於了元參寥輩酬答往來形諸歌詠初何嘗以異端棄之邑之林泉幽邃爲修真逃禪者所爭趨方外奇蹤益令山川增勝矣擇其尤者附載於篇庶足以資博覽云作仙釋傳

仙

當陽縣志

卷十三

人物

仙釋

三十一

漢葛鉉字孝先句容人稚川從祖也有道術遇親朋輒邀止折草刺樹以杯承飲皆旨酒又取瓦礫草木之實勸客皆脯棗嘗脩真於邑之紫蓋山煉丹井存焉又有孝先閣

晉張驚喜字彥悅冀州人張華族也永康中隨父任當陽棄俗脩真南遊至寶慈觀仙去

梁胡伯女年十四有悟遊當陽圓臺山築室環列羣書居七十年蛻解去

唐司馬子微臺州人嘗隱於內方及邑之三星山後

人因名其地曰馬仙村李白云余昔於江陵見天臺  
司馬子微謂余有仙風道骨可與神遊八極之表乃  
著大鵬賦以見志

樊夫人劉綱妻綱爲上虞令能檄召鬼神嘗與夫人  
較術卒不勝後偕仙去貞元中夫人遊湘潭隱姓字  
但稱湘媪止人舍十餘載以丹篆療病後里人棹媪  
之洞庭遇道士始知爲樊夫人也傳於紫蓋山飛昇  
云舊志

玉真公主唐睿宗第九女開元時嘗脩煉於邑之圓

當陽縣志

卷十三

人物

仙釋

三十二

臺山今燦霞觀其遺蹟也

曹何二仙姑莫詳其始有洞在九子山麓暝旦時常  
以鐵舟浮堰中云

明朱風子不知何許人狀類顛者居青溪言人禍福  
多奇中時行乞於鄉有餘則以給眾丐一日謂土人  
曰我且死幸瘞我衆從之歲餘有見風子荷擔於道  
者眾駭之發其塚空穴而已

按郢書云朱顛者不知何許人萬歷末往來荆楚  
間衣百結寒暑不變不乞食與之食則食嘗臥叢

蘭寺殿角下風雪累日弗起咸以爲死視之酷睡如故性嗜飲每出必醉醉則裸而舞口喃喃歌如云海外玉皇披象皮不知何謂羣以顛目之袁中道嘗遇於當陽燈市見其醉中自語云且混且混因問燈佳否曰燈甚明路不平燈甚明眼不靈袁歎爲異人焉有謀以酒困之者笑曰神仙醉不死費乃甕頭矣一日肩短榔挂不借之朽者十餘兩別所短入山去好事者從而蹤跡之見其行甚徐而衆奔馳莫能及移時不知所向或曰朱乃中州

當陽縣志

卷十三

人物

仙釋

三十三

諸王孫殆亦謫仙玩世之流與

以上仙

釋

晉慧遠雁門樓煩人姓賈氏師事釋道安及石勒將亂安與遠偕衆渡襄陽襄陽陷乃振錫南遊常倡道於邑之廣福山今涪溪龍泉圓通諸寺皆其道場也後結宇廬山不復出八十三終

隋智者禪師名顓本陳氏荊州公安茅穗里人祖梁封益陽侯父起有子二次即顓童時出家從師南嶽誦法華經獨具慧悟將復遠遊母止之曰甘旨誰供

顛指茅化爲稻指水化爲油遂入天台又居金陵光宅寺隋開皇初晉王廣既平陳迎顛西上止玉泉山因爲表請立寺居數年復還天台示寂於石城唐宏景玉泉寺僧懷讓惠真皆師之詔居京師主法席後偕道俊還山中宗命朝士賦詩以餞別

神秀河南尉氏人本李姓少爲諸生遊學江表年五十始受具於東都天宮寺問法於黃梅宏忍大師忍歎曰吾度人多矣懸解圓照無如秀者東山之法盡在子矣儀鳳中結廬玉泉之東曰度門蘭若天后召

當陽縣志

卷十三

人物

仙釋

三十四

至都許肩輿上殿命於舊山置度門寺中宗尤加禮重神龍二年示寂於天宮寺壽百餘歲諡大通勅歸葬楞伽峯之麓張說撰碑文盧藏用書禪門傳北秀南能兩宗分列獨孤及云秀公師弟兩京法主三帝國師度門之盛如此而曹溪寂如矣

按禪門謂神秀與惠能同師宏忍忍五祖也秀爲北宗能爲南宗俱稱六祖云

一行內黃人張公瑾孫初隱嵩山後住當陽山曾奉勅考正前代歷法造開元大衍歷

五代齊己俗姓胡益陽人性耽吟號詩囊與鄭都官  
谷相友善晚年託跡江陵作渚宮莫問篇十五首以  
見志常往來玉泉題吟甚多著有白蓮集十卷孫光  
憲爲之序

宋道悟婺州東陽張氏子神姿挺異精脩梵行初棲  
禪於邑之柴紫山學徒嚮風時裴均尹江陵問法勤  
至師坐而揖之裴愈加皈向後歸荊州天皇寺元和  
丁亥四月示寂

慕容玉泉寺僧宋天禧末詔修玉泉寺賜三千金置

當陽縣志

卷十三

人物

仙釋

三十五

常住田並賜龍眉龍角鎮寺

元廣鑄號鍾山玉泉寺住持時唐賢詩碑蕪沒於荆  
門鑄請舁回本寺

明正誨號無跡邑人劉氏子幼讀書多解義十歲祝  
髮於石寶山年二十詣荆南訪天柱和尚柱器之留  
三年遍閱大藏柱沒乃之兩都登講席慈聖太后賜  
千金修玉泉寺正誨自都歸省訪度門於玉泉東七  
里見古寺荒涼榛棘滿目慨然修復遂老度門閉關  
靜修天啟六年正月先期告逝至期端坐說偈說畢

而逝塔於楞伽峯神秀塔旁著有八識略莊子註及  
諸文諸稿 以上釋

當陽縣志

卷十三

人物

仙釋

三十六

當陽縣志卷十三終